

四庫全書

子部

欽定四庫全書

子部

山堂肆考卷十五
六

詳校官中書臣孫溶

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣王頌修

欽定四庫全書

山堂肆考卷十五

明 彭大翼 撰

地理

地

抱朴子曰太極初構萬物始分故天先成而地後定白
虎通地者元氣所生萬物之祖也

疏謙

見天

貴貞

漢書天道貴信地道貴貞不信不貞萬物不生

道卑

易謙卦天道下濟而光明地道卑而上行

德方

易坤卦坤至柔而動也剛至靜而德方

廣輪

周禮大司空掌天下地土之圖周知九州之地域廣輪

之數注云東西為廣南北為輪

牡牝

家語子夏曰地東西為緯南北為經山為積德川為積
刑高者為生下者為死丘陵為牡川谷為牝

辨物

周禮大司徒以土會之法辨五土之物生一曰山林動
物宜毛植物宜阜二曰川澤動物宜鱗植物宜膏三曰
丘陵動物宜羽植物宜覈四曰墳行動物宜介植物宜

筴五曰原隰動物宜羸植物宜叢

縮脉

神僊傳費長房遇壺公有神術能縮地脉千里聚在目
前放之復如舊

金柱

關令內傳地厚萬里其下得大空大空四角下有自然
金柱方圓五千里也

銅儀

東漢張衡字平子南陽人作候風動地儀以精銅鑄其
器圓徑八尺蓋合隆起形似酒罇飾以篆文及山龜鳥
獸之狀罇中有都柱旁行八道施闕發機外有八龍首
各銜銅丸下有蟾蜍張口承之地或動則隨其方面龍
吐銅丸伺者因此乃知震動之所在

行馬

易坤卦牝馬地類行地無疆王弼注乾以龍御天坤以
馬行地

御驥

孫楚祖道詩御天惟龍御地以驥利有攸往不期而至

母德

楊泉物理論地者其卦曰坤其神曰祇其德曰母地形有高下氣有剛柔物有巨細味有甘苦

媪神

漢書惟泰元尊媪神蕃釐經紀天地作成四時注曰媪地神也

步極

淮南子曰禹使太章步自東極至於西極二億三萬三千五百里七十五步使豎亥步自北極至於南極二億三萬三千五百里七十五步

分野

星經角亢鄭之分野兗州氐房心宋之分野豫州尾箕燕之分野幽州南斗牽牛吳越之分野揚州女虛齊之分野青州危室壁衛之分野并州奎婁魯之分野徐州

胃昴趙之分野冀州畢觜參魏之分野益州東井與鬼
秦之分野雍州柳星張周之分野三河冀軫楚之分野
荊州角亢等星謂之二十八舍主十二州

不滿

列子曰共工氏與顓頊爭帝不勝而怒乃頭觸不周之
山崩天柱折地維絕故天傾西北日月星辰就焉地不
滿東南百川水潦歸焉

常動

春秋元命苞天左旋地右動尸子曰天左舒而起牽牛地右闢而起畢昴河圖括地象地常動不止譬如人在舟中開牖而坐舟行而人不覺也

骨脉

張華博物志地以名山為輔佐石為之骨川為之脉草木為之毛土為之肉三尺以上為糞三尺以下為地

膏腴

金陵者洞墟之膏腴勾曲之地肺注云其地肥良曰膏

腴水至則浮曰地肺按膏腴二字本自人身而言背上肥曰膏腹下肥曰腴今以此喻土地之饒美者

統形

文中子曰地者統元形焉非止山川丘陵之謂也

積塊

見天

墨子稱仁

墨子曰禽子問天地孰仁墨子曰翟以地為仁民衣焉

食焉死焉塚焉地終不責德焉故以地為仁

管仲知數

齊桓公問管仲曰地數可得聞乎仲曰東西二萬八千里南北二萬六千里出水者八千里受水者八千里

戴日戴斗

爾雅岨齊州以南戴日為丹穴北戴斗極為空桐東至日所出為太平西至日所入為太蒙太平之人仁丹穴之人智太蒙之人信空桐之人武注云戴值也

多暗多聾

淮南子曰山氣多男澤氣多女障氣多暗嵐氣多聾林
氣多癰木氣多偃岸下氣多腫石氣多力險阻氣多癭
暑氣多天寒氣多壽谷氣多瘿丘氣多狂衍氣多仁陵
氣多貪輕土多利重土多遲清水音小濁水音大湍水
人輕遲水人重中土多聖人皆象其氣氣皆應其類

九州

爾雅兩河間曰冀州河南曰豫州河西曰雍州漢南曰

荊州江南曰揚州濟河間曰兗州濟南曰徐州燕曰幽
州齊曰營州

九府

爾雅東方之美者有醫無閭之珣玕琪焉東南之美者
有會稽之竹箭焉南方之美者有梁山之犀象焉西南
之美者有華山之金石焉西方之美者有霍山之多珠玉
焉西北之美者有崑崙虛之璆琳琅玕焉北方之美者有
幽都之筋角焉東北之美者有斥山之文皮焉中有岱

岳與其五穀魚鹽生焉注云醫無閭山名今在遼東珣玕琪玉之屬也璆琳美玉名琅玕狀似珠山海經崑崙有琅玕樹文皮虎豹皮之綵縠者

十洲

東方朔海內十洲記一曰祖洲一曰瀛洲在東海中與會稽相對一曰玄洲在北海中戌亥之地一曰炎洲在南海中一曰長洲在南海辰巳之地一曰元洲在北海中一曰流洲在西海中一曰生洲在東海丑寅之間一

曰鳳麟洲在西海中央一曰聚窟洲在西海中未申之地又有扶桑蓬萊崑崙謂之三島又日本國所屬豐前豐後等曰九島又謂之九州

十數

爾雅魯有大野晉有大陸秦有楊陁宋有孟諸楚有雲夢吳越之間有具區齊有海隅燕有昭余祁鄭有圃田周有焦護郭璞注大野今高平鉅野縣東北大澤是也大陸今鉅鹿北廣河澤是也楊陁今在扶風汧縣西孟

諸在梁國睢陽縣東北雲夢今南郡華容縣東南巴丘湖是也具區今吳縣南太湖即震澤是也海隅海濱廣斥昭余祁今太原鄆陵縣北九澤是也圃田今滎陽中牟縣西圃田澤是也焦護今扶風池陽縣瓠中是也

八黃

淮南子曰九州之外乃有八黃亦方千里自東北方曰大澤曰無通東方曰大渚曰少海東南方曰具區曰無澤南方曰大夢曰浩澤西南方曰渚資曰丹澤西方曰

九區曰泉澤西北方曰大夏曰海澤北方曰大冥曰寒澤

八紘

淮南子曰八紘之外迺有八紘東北方曰和丘曰荒土東方曰棘林曰桑野東南方曰大窮曰衆女南方曰都廣曰反戶西南方曰焦僥曰炎土西方曰金丘曰沃野西北方曰一目曰沙所北方曰積冰曰委羽

八極

淮南子曰八紘之外乃有八極東北方曰方土之山曰
蒼門東方曰東極之山曰開明之門東南方曰波母之
山曰陽門南方曰南極之山曰暑門西南方曰編駒之
山曰白門西方曰西極之山曰閭闔之門西北方曰不
周之山曰幽都之門北方曰北極之山曰寒門又晉地
理志八極之廣東南西北相去各二億二萬餘里自地
至天半八極之數又爾雅東至泰遠西至邠國南至濮
鈞北至祝栗謂之四極

八柱

淮南子曰天有九柱八紀地有九州八柱按河圖括地象崑崙為柱氣上通天崑崙者地之中也地下有柱柱廣十萬里有三千六百軸互相牽制名山大川孔穴相通又曰凡天下有九區別為九州中國九州名赤縣即禹貢之九州也上云九州八柱乃大九州非禹貢之小九州也

四荒

爾雅觚竹北戶西王母日下謂之四荒九夷八狄七戎
六蠻謂之四海注云觚竹在北北戶在南西王母在西
日下在東皆四方昏荒之國次四極者

四游

尚書考靈耀地有四游冬至地上北而西三萬里夏至
地下南而東三萬里春秋二分則中矣

三壤

梁元帝纂要高泰衡華恒謂之五嶽江河淮濟謂之四

瀆上中下謂之三壤山林川澤丘陵墳衍原隰謂之五土

五方

蠻夷戎狄中國曰五方爾雅東方有比目魚焉不比不行其名謂之鰈南方有比翼鳥焉不比不飛其名謂之鸛鸛西方有比肩獸焉與叩叩叩虛比為叩叩叩虛鰒甘草即有難叩叩叩虛負而走其名謂之鰒北方有比肩民焉迭食而迭望中有枳首蛇焉此四方中國之異

氣也注云鰈狀似牛脾一眼兩片相合乃得行江東呼
為王餘魚鵲鵲似鳬一目一翼相得乃飛北方有獸其
名為蟹鼠前而兔後趨則頓走則顛叩叩鉅虛鼠後而
兔前前高不得取甘草故須蟹食之今鴈門廣武縣夏
屋山中有獸形如兔而大相負共行俗名之為蟹鼠是
也比肩民即半體之人各有一目一鼻一孔一臂一腳
亦猶魚鳥之相合更望以備驚急枳首蛇歧頭蛇也江
東呼為兩頭蛇

十形

楊泉物理論土地皆有形名而人莫察焉有龜龍體有麟鳳貌有弓弩勢有斗升象有張舒形有塞閉容有隱真之安有累卵之危有膏腴之利有壻墉之害此十形者氣勢之始終陽陰之所極也

七表

河圖括地象天有五行地有五嶽天有七星地有七表天有八氣地有八風天有九道地有九州天有四維地

有四瀆

五溪

五溪在辰州府盧溪縣西武山鄺道元水經武陵有五溪謂雄溪楠溪酉溪瀟溪辰溪皆槃瓠子孫所居又杭州有九溪曰西溪茗溪仇溪錦溪交溪紫溪葛溪雙溪晚溪是也

三川

西周有三川涇洛汭秦有三川伊洛河蜀有四川西川

成都東川潼州北川利州南川夔州又禹貢有九川謂弱水黑水河水漢水江水沔水淮水渭水洛水也

三河

唐堯都河東殷都河內周都河南謂之三河又禹貢有九河曰徒駭太史馬頰覆釜胡蘇簡潔鉤盤鬲津其一則河之經流也其四海三江五湖等俱見後海與江湖類

九澤

禹貢九澤既陂謂大陸雷夏孟渚滎澤大野彭蠡震澤
雲夢荷澤也又史記司馬相如傳臣聞楚有七澤臣之
所見特其小小者耳名曰雲夢方九百里

三城

唐張仁愿取漠南之庭於河北築三受降城首尾相應
以絕突厥南寇之路三城拂雲祠為中城與東西兩城
各四百餘里

七渡

長編左司諫吳表臣言大江之南上自荆鄂下至常潤
十郡之間其緊要之處不過七渡又有三流上流最緊
者三荆南之公安石首岳之北津中流最緊者二鄂之
武昌太平之采石下流最緊者二建康之宣化鎮江之
瓜洲是也惟此七渡當擇官兵脩器械其餘畧為之防
足矣

三岡

三岡在山西大同府應州趙霸岡在城東黃花岡在城

西護駕岡在城南又有四鎮安邊鎮在城東大羅鎮在城南司馬鎮在城西神武鎮在城北

九郡

漢武帝命路博德平南越獲建德呂嘉遂以其地為南海蒼梧鬱林合浦交趾九真日南珠崖儋耳郡是為九郡後平西南夷復置五郡邛都為越雋郡笮都為沈黎郡冉駹為汶山郡廣漢西白馬為武都郡又有武威張掖酒泉燉煌金城為河西五郡

五嶺

漢書吳祐傳注云嶺自衡山之南東至於海一山之限耳別標名則有五焉又裴氏廣記大庾始安臨賀桂陽揭陽是為五嶺

五陵

長陵漢高祖安陵惠帝陽陵景帝茂陵武帝平陵昭帝杜詩五陵衣馬自輕肥即此

三湘

寰宇記湖廣長沙府湘潭湘鄉湘陰三縣曰三湘

三關

燕有三關松亭古北居庸漢有四關東成臯南伊闕西
函谷北孟津

三輔

漢三輔京兆左馮翊右扶風共在長安中分領諸縣

三口

三口謂清河口渦口潁口也宋真德秀上言今淮東要

害在清河之口淮西糧道在渦潁之口敵之糧道實出於此故欲固兩淮須防三口按淮東今淮安揚州諸處又曰淮左淮西今汝寧鳳陽廬舒等處又曰淮右至於邳徐豐沛諸處曰淮北

兩都

漢兩都謂西都東都也西都在雍州東都在洛陽班固作兩都賦即此左太冲有三都賦謂蜀都吳都魏都也又上都京兆東都河南西都鳳翔南都江陵北都太原

謂之五都一說雒陽邯鄲臨淄宛城郭市長安曰五都
王莽更名五液

二京

二京謂東京西京也張衡擬班固兩都賦作二京賦

三巴

三巴謂中巴東巴西巴是也漢末劉璋為益州牧置永
寧縣治江州號中巴即今重慶府是也又置巴東治永
寧縣即今夔州府是也又置巴西郡治閬中縣即今保

寧府是也

三峽

巫峽在夔州巫山縣東即巫山也與西陵峽歸峽並稱
三峽

三邊

幽州并州涼州曰三邊又有九邊曰遼東太寧宣府大
同寧夏甘肅薊州榆林固原是也

四塞

韓生說項羽曰關中阻山帶河四塞之地可都以霸蓋
關中東有黃河函谷蒲津龍門合河等關南有南山及
武關峽關西有大隴山及隴山關大震烏闌等關北有
黃河南塞是謂四塞

九市

班固傳長安有九市其六在道西三在道東

五服

侯服甸服男服采服衛服謂五服古者先王治天下而

侯甸等所以服事天子者各有遠近之差故曰服

三吳

據水經以吳興吳郡會稽為三吳通典又以吳興吳郡
丹陽為三吳二說似有不同然不知秦時定江南初置
會稽郡至漢武帝又分湖州為吳興故二說不同以此又會稽
郡三國又獨以湖州為吳興故一說不同以此又會稽
郡非今紹興之會稽即蘇常杭嘉也一說以蘇州為東
吳潤州為中吳湖州為西吳

三楚

楚文王都郢楚昭王都郢楚考烈王都壽春故為三楚
又謂江陵為南楚吳為東楚彭城為西楚乃以此三地
在楚之東西南故云一說以淮南沛陳汝南為西楚衡
山九江江南豫章長沙為南楚彭城東海廣陵為東楚

三秦

初項籍自立為西楚霸王立章邯為雍王王咸陽以西
都廢丘司馬欣為塞王王咸陽以東都櫟陽董翳為翟

王王上郡都高奴是為三秦

三晉

春秋晉有智氏趙氏韓氏魏氏范中行氏號六卿後晉君失政六卿專權周定王十一年智韓趙魏共滅范中行分其地十六年趙韓魏又共滅智氏分其地安王二十六年三家共廢晉君而分其地號曰三晉

三齊

顏師古曰三齊濟及齊北膠東也

百粵

地理志粵地牽牛婺女之分野也三代時蓋藩服世稱古百粵粵即越國周顯王時楚滅越其族散處江南海上各為君長有甌越雒越之屬甚蕃故曰百粵以粵為揚州南境又曰揚越秦始皇利粵犀象珠璣乃使尉屠睢統五軍監祿鑿渠以通糧道殺西甌君譯吁宋越人皆入叢薄中與禽獸處莫肯附秦陰置樂駿以為將夜攻秦人殺尉屠睢秦乃發戍備之後王翦滅楚乘勝畧

定揚越陸梁地為桂林象郡秦末為南越王趙佗所據
傳至趙光時漢武平南越光遂降漢以其地為蒼梧鬱
林合浦郡屬交趾部又三越杭州為吳越廣州為南越
福州為閩越或問閩中謂之閩越者何蓋秦立閩中郡
及漢興師越人佐漢有功復立無諸為閩越王王閩中
故地都治今建寧之建安福州之侯官是其地故謂之
閩越

二周

二周謂東周西周東周洛陽西周鎬京

兩漢

兩漢謂西漢東漢也西漢都長安東漢都洛陽

八閩

圖經閩中八郡建劔汀邵號上四州其地多溪山福泉
漳興號下四州其地多坦夷謂之八閩周時為七閩地
秦屬閩中郡漢屬閩越國按劔州即今延平府宋名劔
浦

兩浙

寧紹溫台嚴金衢處為浙東杭嘉湖在浙水之西為浙西

三韓

東夷有三韓一曰馬韓二曰辰韓三曰弁韓馬韓在西有五十四國其北與樂浪南與倭接辰韓在東有十二國其北與濊貊接弁韓在辰韓之南亦有十二國共七十八國百濟是其一國焉

三苗

三苗國名堯時四夷之地今為湖廣江鄂岳之三州故
今三州人多苗姓是其遺種

九夷

畎夷于夷方夷黃夷朱夷玄夷白夷風夷陽夷曰九夷
又東夷西戎南蠻北狄曰四夷

四蠻

東方曰寄南方曰象西方曰狄北方曰譯謂之四蠻又

南方之蠻有五種以金裹兩齒曰金齒蠻漆其齒曰漆齒蠻文其面曰繡面蠻刺其足曰花腳蠻以綵繩撮髻曰花角蠻又有八蠻

五狄

月支狄赤狄匈奴狄單于狄白狄為五狄

五胡

劉淵匈奴也居晉陽石勒羯也居上黨苻氏氏也居臨渭姚弋仲羌也居扶風慕容廆鮮卑也居昌黎是為五

胡

五涼

晉有五涼張軌據河西今甘州為前涼呂光繼之為後涼李嵩遷酒泉今肅州號西涼沮渠蒙遜據張掖今鎮蕃衛號北京禿髮烏孤據姑臧今西寧號北京按杜氏通典論涼州地勢之險可以自保於一隅財富之殷可以無求於中國故五涼相繼與五胡角立中州人士避難者多往依之唐韋蟾詩賀蘭山下果園成塞北江南

舊有名蓋稱其為塞北之江南也其風土之可樂如此

兩蠻

華陽國志蠻昌寧大姓也南蠻有兩蠻一曰東蠻烏蠻
一曰西蠻白蠻西蠻之先為晉南寧郡守因中國亂遂
王蠻中號曰南寧西蠻

二甌

寰宇記永嘉郡為東甌鬱林郡為西甌又按舊經閩越
地即東甌也今福州温州是其地

六詔

南詔之先本哀牢夷地居姚川西東南接交趾西北接吐蕃蠻語謂王曰詔先有六詔一曰蒙雋詔二曰越析詔三曰浪穹詔四曰邏睨詔五曰施浪詔六曰蒙舍詔唐開元末蒙舍詔皮羅閣浸疆大而五詔微弱乃賂唐劍南節度使王昱求合六詔為一朝廷許之賜名歸義徙居太和城以其在五詔之最南故號曰南詔

山堂肆考卷十五

欽定四庫全書

山堂肆考卷十六

明 彭大翼 撰

地理

山

楊文易卦序險而止山也險而動山也動靜皆蒙險
故曰山春秋說題辭山之為言宣也含澤布氣調百
神也郭熙曰春山淡冶如笑夏山蒼翠如滴秋山明
淨如妝冬山慘淡如睡聳氏耳目志海山微茫而隱

見江山嚴厲而峭卓溪山窈窕而幽深塞山童穎而堆阜王涯仙掌辯論山形曰銳而出者為虎牙尖而背者為熊耳角而嚙者為牛首冠而峭者為雞頭

龍蟠

鍾山舊名金陵山在建康北諸葛亮嘗曰鍾山龍蟠石城虎踞真帝王之宅也漢末秣陵尉蔣子文與賊戰亡於此吳大帝為立蔣公祠又以帝祖諱鍾因改山曰蔣山晉元帝渡江望氣者云山有紫氣又改曰紫金山

狼踞

通州城南十八里臨大江為狼山或謂以形似狼或謂
白狼嘗踞其上後以泗州佛法厭去之東為刀刃山一
名劒跡山相傳秦始皇於此磨劒又東為軍山或曰越
王嘗軍於此西為塔山與狼山相接其上有塔又西為
馬鞍山以形似馬鞍也五山相連屬而狼山為最奇

鹿起

舒城縣東南鹿起山昔有僧過此一鹿自山出僧即其

地以化

馬當

馬當山在九江府彭澤縣東北橫枕大江山象馬形故名陸魯望銘天下之險者在山曰太行在水曰吕梁合二險而為一吾又聞乎馬當

鳳鳴

岐山在鳳翔府岐山縣東北山有兩岐故名亦曰天柱山周太王邑於岐山之下文王時鳳凰鳴於岐山即此

鳥弔

鳳羽山在雲南大理府浪穹縣西南相傳蒙氏細奴邏興時有鳳翔於此故名鳳羽後鳳死每歲冬衆鳥哀弔其上故又名鳥弔

羊飛

羊飛山在夔州府萬縣西南昔有人學道於此嘗養一羊忽一日戒童子云勿放羊童子放之一羊冲天而去
猿啼

猿啼山在長沙府瀏陽縣治南唐裴休讀書於此時聞猿啼

鳳凰

鳳凰山在鳳陽府壽州東北府在鳳凰山之陽故名鳳陽府山有淮南王安賓客之遺跡昔有人獲小金牌可以療病疑為丹砂所化周世宗破南唐軍於紫金山即此杭州青波門東南亦有此山下俯大江山勢若鳳凰欲飛之狀又有石如片雲拔地高數丈亦奇峰也將至

顛有一竅尺餘名月巖惟中秋月穿竅而出十四十六日則外此竅矣一郡王氣皆藉此山

鸚鵡

外夷瓜哇國有鸚鵡山蘄州城中有麒麟山金陵西與馬鞍山相接有獅子山俱以形相似得名晉元帝初渡江見獅子山綿延不斷以擬北地盧龍又易名盧龍山

鳥鼠

括地志鳥鼠山今名青雀山在渭州渭源縣西爾雅鳥

鼠同穴其鳥為鶩其鼠為鼯注云鼯如人家鼠而短尾
餘似鴉而小黃黑色穴入地三四尺鼠在內鳥在外今
在隴西首陽縣鳥鼠同穴山中孔氏尚書傳曰共為雄
雌

龍虎

龍虎山在廣信府資溪縣兩石對峙如龍昂虎踞乃三
十一福地漢張道陵修煉之所今張天師世襲真人居
之

牛渚

牛渚山在當塗縣西北近采石磯亦名燃犀浦世傳下
多怪物即晉溫嶠燃犀處

虎丘

虎丘山在蘇州府長洲縣西北平田中有小丘越絕書
吳王闔閭葬此用黃金珠玉扁諸之劍魚腸之干以殉
越三日白精結為白虎踞其上唐避諱改名武丘顏真
卿書虎丘劍池石刻四字池之前有平石曰千人坐蓋

神僧竺道生講經處唐李陽冰篆生公講經臺分刻二石臺側有點頭石石上有可中亭左右白蓮池陳顧野王序高不抗雲深無藏景卑非培塿淺異踈林路若絕而復通石將斷而更綴抑巨麗之名山大吳之勝壤也

鷺湖

鷺湖山在鉛山縣北山上有湖生荷舊名荷湖山後有人龔氏嘗畜鷺於此故又名鷺湖唐王駕詩鷺湖山下稻梁肥即此

鴈蕩

温州鴈蕩山記予觀鴈蕩諸峰皆峭拔險怪上聳千尺
穹崖巨谷不類他山皆包在諸谷中自嶺外望之都無
所見至谷中則森然干霄原其理當是谷中大水衝激
沙土盡去惟巨石巋然挺立耳又荊州記楚有景山凡
鴈南翔北歸偏經其上謂之鴈塞山

馬陵

馬陵山在兗州郟城即古瑯琊山也一在宿遷縣北

雞澤

雞澤山在北直隸廣平府雞澤縣境杜預云在廣平曲

梁西南

龍壁

廣西柳州府有龍壁山宋陶弼詩曾讀柳侯山水記信
知龍壁好烟霞

驢泉

驢泉山在德安府隨州城北北山石潤牛馬經過貪其

泉甘不肯去土人有牛馬解逸即往此山尋之

雞籠

雞籠山在金陵覆舟山之西後臨玄武湖元嘉中立儒館於北郊命雷次宗居之次宗因開館於山齊高帝嘗就次宗受禮及左氏春秋

鳥帶

會稽記諸暨縣有鳥帶山其上多紫石居士謝敷少時經始諸山功費千計生業皆盡後遊此境夢山神語之

曰當以五十萬相助旦見主人牀下有異色石試取磨拭之乃紫石也因問所從來云出此山遂往掘之得利不訾

鹿門

鹿門山在襄陽府東南漢龐德公唐龐蘊孟浩然皮日休俱隱於此又江西豐城縣南有龍門山傍有龍湫西北與道人山相接相傳馬禪師駐錫於此寧波定海縣有蛟門山出此即大海洋古人稱蛟門虎蹲天設之險

卽此地也

燕巖

太原府壽陽西山多蟄燕因以名山曰燕巖

牛頭

牛頭山在江寧縣南狀如牛頭晉元帝渡江草創欲立石闕於宮門未定王導隨駕出宣陽門乃遙指山南峰為天闕中宗從之梁武帝建寺於石窟下名仙窟又有文殊辟支二洞白龜虎跑二泉後有昭明飲馬池自山

徑中起數百級古杉蒼檜行列上有佛宮曰弘覺寺寺有浮圖二殿闕廊宇依山結構望之如畫屏北與獻花巖祖堂相連佛經所謂江表牛頭是也宋大明中立郊壇於山之南峰岳飛設伏牛頭以邀烏珠即此

熊耳

熊耳山在河南盧氏縣西南兩峰相竝如熊耳禹貢所謂導洛自熊耳即此又宜陽縣亦有熊耳山史記漢光武破赤眉積甲宜陽城與熊耳山躋是也陝州東亦有

此山乃達摩葬處其塔尚存

墓願

墓願山在眉州城東自象耳山連峰壁立西瞰玻璃江
磅礴蹲踞形類墓願故名山腹有穴曰龍洞唐末有楊
太虛爾朱先生得道於此眉州故事人日出東郊渡玻
璃遊墓願即此山也東坡有詩

龜首

龜首山在蘇州府為洞庭西山之支嶺其麓有石闕出

如鼇首因名山產石有天然玲瓏者為花石雕琢擊之
有金玉聲有色白而溫潤者為玉石堪為玩器有胎斑
而光澤者可製硯

象鼻

桂林府有象鼻山在訾家洲之西突起水濱形狀類象
故名下有水月洞孔鑄詩象鼻分明飲玉河西風一吸
水應多青山自是多奇骨白日相看厭多

虎牙

荊州府城南大江北岸與荊門山相對有虎牙山昔公孫述遣將依二山作浮橋拒漢師陝西延安府神木縣有龍眼山

鷹嘴

鷹嘴山在廣德州南山絕頂一石卓立高十餘丈如鷹嘴有深窟可容百餘人

雞頭

雞頭山在平涼府崆峒山之西以形似名史記黃帝西

至於崆峒登雞頭山秦始皇二十七年辛巳巡隴西北地至雞頭山過回中即此銅陵縣北有鵠頭山其形高聳宛若鵠頭

羊腸

羊腸山在山西太原府交城縣東北郡國志萬根谷石磴縈委若羊腸然後魏於此立羊腸倉

狗脊

狗脊山在開封府中牟縣治後上產麻黃

委羽

委羽山在黃巖縣昔劉奉林控鶴墜翮因名山為委羽

落翮

山海經大翮山小翮山有王仲廟仲字次仲秦始皇時
變蒼頡舊文為今隸書帝使使徵之不至始皇大怒檻
車迫之次仲化為大鳥出於車外翻然高翔至於西門
山落二翮因名鳥翮山今山在北直隸隆慶州城北

釣魚

釣魚山在重慶府合州之東山南大石砥平有巨人跡相傳異人坐其上投釣於江因名宋理宗時余玠用播州人冉璉及弟璞之謀城釣魚山則蜀可守即此

繫馬

繫馬山在登州府寧海州東世傳秦始皇遊此攬草繫馬至今草生若繫結之狀

凍雀

大同府城東北有紇干山紇干胡語猶華言千里也其

山冬夏積雪故諺曰乾千山頭凍殺雀何不飛去生處
樂

棲鷹

成都府茂州北有鷹門山以山多棲鷹故名

鬪雞

桂林志鬪雞山在雉山之東兩山相向在江左右如鬪
雞然巧石如雞欲鬪時昂冠相距水東西紅羅纏頸何
曾見老殺青山不敢啼

發鳩

山海經發鳩之山有鳥狀如鳥首白喙赤名曰精衛炎
帝女遊東海溺而不還化為此鳥嘗銜西山木石以填
東海山在上黨長子縣

休牛

博物志桃林在湖城縣休牛之山有石焉曰帝臺之棋
也五色而文狀如雞卵

去虎

去虎山在蕭山縣北山有猛虎傷人一夕負子渡江而去宋令尹杜守一因名其山曰去虎

果老跨驢

山西平陽府蒲州東有中條山跨平陸芮城安邑夏縣解州之境乃張果老跨白驢之處

初平牧羊

神仙傳黃初平年十五家使牧羊有道士見其良謹將至金華山居石室中四十餘年不念其家兄初起行索

初平遇道士引至山與弟語語畢問羊何在平與兄往
至山東見白石平因叱之石起成羊數萬頭又劉向列
仙傳周成王時葛由嘗騎木羊上中嵯山山有葛仙洞
又名綏山諺云得綏山一桃雖不得仙亦足以豪此山
與小嵯大嵯山相連是為三嵯

琴高控鯉

琴高山在涇縣東相傳為琴控鯉上昇之所

令威化鶴

遼東都司城東有華表山昔人丁令威化鶴於此故名

黃鶴

黃鶴山在湖廣武昌府西南蒼仙入子安乘黃鶴過此故名上有黃鶴樓唐崔顥詩昔人已乘黃鶴去此地空餘黃鶴樓黃鶴一去不復返白雲千載空悠悠晴川歷歷漢陽樹芳草淒淒鸚鵡洲日暮鄉關何處是烟波江上使人愁又岳州府城南有白鶴山昔有江叟嘗遇樵夫遺以鐵笛吹之無聲一日登此山吹於紫荆臺響震林

木忽有兩女出授神藥云服此當為水仙子蓋龍女也臨海記郡西亦有白鶴山

碧雞

碧雞山在雲南府西南東瞰滇澤蒼崖萬丈綠水千尋月印澄波雲橫絕頂雲南一佳景也漢宣帝時方士言益州有金馬碧雞可祭而致遣王褒往祀至蜀而卒顏師古曰金形如馬碧形似雞集覽其神祠在益州金馬坊金馬山在府城東西對碧雞山中隔滇池山不甚高

而綿亘西南數十里上有長亭下有金馬關

黃牛

黃牛山在荊州府夷陵州西即黃牛峽峭壁間有石如人負力牽牛狀人黑牛黃

白馬

白馬山在處州宣平縣西山有瀑布泉石室中有巨石屹立擊之鏗然相傳葉法喜嘗棲於此

烏峽

鳥峽山在廣西梧州府岑溪城西壁立萬仞乃本縣之門戶也

黃陵

黃陵山在湘陰縣舜二妃廟在焉

絳巖

絳巖山在句容縣西南一名赭山上有龍穴祠壇寰宇記本名赤山唐天寶中改為絳巖一名丹山丹陽之義起於此

赤壁

赤壁山在武昌府東南樊口之上江之南岬即周瑜破曹操處東坡之遊自在黃州晁補之曰因其賦中有而今安在之言遂誤為破曹之地以致後人紛紛辯論皆起於此

玄扈

玄扈山在西安府商州洛南縣黃帝時鳳銜圖至此山帝拜受之

綠林

綠林山在荊州府當陽縣東南王莽末馬武王常等藏此山中數月間致有七八千人即此

藍田

地理志藍田山在西安府藍田縣東南山出玉英故名四皓避秦逃入此山

青城

青城山在成都府灌縣西南山有丈人峰故今岳父為

青城以此又有七十二小洞應七十二候八大洞應八節道書為第五洞天乃神仙都會之處唐杜光庭有記又天台縣有赤城山上有赤色如雲霞望之如雉堞故曰赤城李白詩門標赤城霞樓觀滄海月又太平府東南有青墩山齊宣城太守謝朓築室於此山之南一名謝公山

白苧

宣城圖經白苧山本名楚山晉桓溫嘗領妓遊此山奏

樂好為白苧歌因改名焉

綠蘿

綠蘿山在常德府桃源縣乃四十一福地也

紫帽

紫帽山在泉州府西南嘗有紫雲覆其巔唐時泉人客洛陽邂逅一羽衣寄書紫帽隱者其人既歸投書於隱者隱者遺以米半升其人還家視之乃金粟也宋徽宗御書金粟之洞四字刻石在焉

翠簾

翠簾山在延平府將樂縣南蒼翠高聳如垂簾狀

白帝

白帝山在夔州府城東公孫述據蜀殿前井中嘗有白龍出因自稱白帝更號魚復縣城曰白帝城

烏蠻

烏蠻山在柳州府柳城縣東南山高聳臨江下有潭

白星

白星山在廣東韶州仁化縣西唐武德中有星墜山頂
光如曳練故名

紫雲

紫雲山在嘉興府海鹽縣西南相傳唐建中間有村女
出耕雲嘗覆其上河南府鞏縣有黑雲山昔成湯於此
禱雨忽起黑雲天降大雨

赤甲

赤甲山在夔州府其山高天不生草木人望之如袒臂

故謂之赤甲杜詩卜居赤甲遷居新兩見巫山楚水春
青眉

青眉山在陝西延安府延安縣西北後魏時有吐蕃青
眉簇居此又江西瑞昌縣有赤顏山赤松子遊處象州
有白面山石壁屹立橫截大江中多白石故名又常熟
縣虞山一名烏目

可藍

可藍山在平涼府城西南赫連據平涼嘗屯兵於此寰

宇記赫連定畋於涼州登可藍山望統萬城泣曰先帝
若以朕承大業豈有今日俄有羣狐鳴於定旁命射之
竟不得乃嘆曰此亦怪事也

點蒼

點蒼山在雲南大理府城西高千餘仞有峯十九蒼翠
如玉盤亘三百餘里山頭有高河泉深不可測又有瀑
布諸泉流注為錦浪等十八川元高昌雅詩水繞青山
山繞城由來人傑地應靈水光萬頃開天鏡山色四時

環翠屏

長白

山東濟南府長山縣西南有長白山又名會僊山山有峰孤秀盤鬱獨壓衆山乃太山之副岳繡江源發於此山高二千九百丈周六十里雲雨長白故名上有醴泉寺即范仲淹讀書處遼東三萬衛亦有此山橫亘千里有潭周回八十里南流為鴨綠江北流為混同江又金國志亦有長白山為白衣觀音所居其山禽獸皆白黑

水發源於此

大黑

大黑山在遼東都司所領金州衛東絕頂有城四面懸絕惟西向一路可通其中有井昔人多避兵於此

江郎

江郎山三峯之上各有一巨石昔山下民兄弟三人化於此晉永嘉之亂有湛滿者亦居山側有一子仕宦不得歸禱於三石旬中湛子出洛水見三少年使閉目入

車中恍然不知所之良久乃至家山在衢州府江山縣
南山頂有池產碧蓮金鯉

程侯

程侯山在山西忻州程嬰匿趙孤於此

羅秀

羅秀山在南寧府城北昔人羅秀於此升僊宋陶弼詩
尋山入羅秀旋結草堂居花露生瓶水松風落架書聞
猿得句後見月出行初此夕雲林下無因夢使車

陳音

會稽記昔有善射者曰陳音越王使簡士卒習射於郊外死葬焉塚壁悉畫騎射之象因以名山為陳音

壺公

福建興化府城南有壺公山山有五音昔人有遇老翁於此忽見宮闕似非人間翁云此壺中日月也後人因名壺公唐翁承贊壺公山詩秋高巖溜白日出海波紅搜神秘覽興化識云壺公山若斷莆田朱紫半水繞壺

公山此時方好者蔡君謨以引水繞壺公山登第從此
在朝朱紫半矣

冶父

冶父山在廬州府廬江縣東北濡湏志舊有人冶鑄於
此故名自麓至巔幾五百里有三百六十四子山羅列
在下山比衆山獨尊故曰父

霍童

霍童山在福寧州寧德縣北神仙霍童所居洞天記所

謂霍林洞天是也

黎母

黎母山在廣東瓊州府定安縣南山下諸蠻環居號黎人供賦役者為生黎耕省地者為熟黎宋徽宗時建鎮州於黎母即此山有五峯又名五指山屹立瓊崖儋萬之間為四州之望每晝雲霧收斂則五峯聳秀挿天至黃昏復蔽不見

皖公

安慶府有皖山與潛山相連一名皖公山本春秋時皖伯所封之地

盧師

盧師山在順天府西隋末沙門盧師居此能馴服大小青龍元天歷中大早有安陵道士持盧師谷蛇名小青龍者至謂禱之即雨蓰縣尹呂思誠以其惑人殺蛇逐道士雨亦隨至遂有年

蘇武

蘇武山在陝西行都司鎮番衛東南相傳蘇武牧羝處故以名山

郭璞

郭璞山在饒州府餘干縣東和南鄉根盤五十里高百仞峯巒俊拔為鄱陽羣山之冠世傳郭璞嘗旅寓於此
伏波

桂林記府東北有伏波山突起千尺懸石如柱去地一線不合俗傳馬伏波試劍石

長卿

保寧府梓潼縣西南有長卿山舊名神山唐明皇幸蜀見山有司馬相如讀書窟因改今名

無量示寂

廣西全州西有湘山峯巒嶺鬱巖洞幽邃上有光孝寺即無量壽佛示寂之所

吳王尋僊

金精山在處州即張麗英僊女宅漢吳王芮領兵入山

鑿洞尋僊女見真人上昇處一在贛州寧都縣

王導建府

幕府山在應天府西北俗名灰山晉元帝渡江丞相王
導建幕府於此故名上有僊人臺虎跑泉

路應為梁

寧國府宣城縣南有響山兩崖對峙下瞰響潭潭上有
釣臺唐刺史路應嘗跨潭為梁建兩亭於崖以營州兵
權德輿鐫記於崖石

許由棄瓢

箕山在真定府唐縣西北其峯若箕形即許由隱處上有許由墓棄瓢巖洗耳溪巢父答問碑

兼道吹笛

趙宋隱士劉兼道遊武夷山奪秀亭劉善吹笛有穿雲裂石之聲因名亭曰鍊笛亭

晉文紀過

史記世家晉文公聞介之推入繇上山中於是環繇上

山中而封之以為介推田號曰介山以紀吾過且旌善人杜預曰西河介休縣名繇上

秦始頌功

史記秦始皇即位三年東巡郡縣祠鄒嶧山刻石頌秦功德按鄒縣本邾國魯穆公改作鄒屬山東兗州府元鮮于樞嶧山詩東方巨鎮稱岱宗羣山列侍臣妾同西南崛起一萬仞却立不屈如爭雄何年天星下天宮墜地化作青芙蓉外如刻削中空洞閭風玄圃遙相通

郝甌

郝甌山在德安府城西後周以此山名縣山有鄖溪景雲潭潭側有唐甌山公郝處俊釣魚臺宋蔡確詩矯矯名臣郝甌山忠言直節上元間釣臺無沒知何處嘆息思公依碧灣

支硎

支硎山在吳縣西晉僧支遁道林隱此且山多平石遂名支硎上有石窟溫泉放鶴亭馬路石皆支遁盤桓處

韓信追項羽

韓山在淮安沐陽縣東北世傳韓信追項羽於此南有
楚王廟

去病擊匈奴

漢應劭曰祁連山本名天山蓋匈奴呼天曰祁連也漢
霍去病以驃騎將軍擊匈奴至祁連山獲首虜三萬後
去病薨上悼之發蜀玄甲軍陣自長安至秣陵為塚象
祁連山按西河舊事祁連山在張掖酒泉二郡界去焉

支山北可千里初匈奴失此二山乃歌曰亡我祁連山
使我六畜不蕃息失我焉支山使我婦女無顏色

諸葛出獵

駒驪山在句容縣東北吳諸葛恪出獵此山見有物如
小兒伸手引人恪令持去故地即死叅佐問之恪曰此
事在白澤圖曰兩山之間有精如小兒名曰侯囊

浮丘煉丹

黃山在寧國府太平縣南當宣徽二郡界有三十二峯

二十六源二十四溪十八洞八大石黃帝與浮丘伯嘗
煉丹於此又廣西梧州北流縣界有勾漏山石峯千百
皆矗立特起其巖穴勾曲穿漏故名山有寶圭洞洞有
石室石池葛洪煉丹竈

焦先隱

焦山在鎮江江中漢處士焦先隱此故名旁有海門二
山上有焦山寺羅漢巖宋理宗書三大字揭之有臺曰
煉丹洞曰三詔因先三詔不起故名崖下有瘞鶴銘據

輟耕錄所載此銘乃華陽真逸撰詞曰相此胎禽浮立
著經乃徵前事我傳爾銘余欲無言爾其藏靈雷門去
鼓華表留形義惟彷彿事亦微冥爾將何之解化惟寧
後蕩洪流前固重局右割荆門厯下華亭奚集真侶瘞
爾作銘後又題云丹陽僊尉江陰真宰刻下鎮江焦山
頑石上潮落方可手摸相傳為晉王右軍書宋黃魯又
曰為陶隱居書今文格字法殊類陶弘景蓋弘景自號
華陽隱居也今號真逸豈其別號歟歐陽文忠又以為

不類王右軍法而類顏魯公又疑真逸是顧況道號

袁京居

袁山在江西袁州府東北昔高士袁京居此故名有大
小二袁山唐人詩袁山大小雙螺竝秀水東西二帶橫
卞和石室

荆山在襄陽府南漳縣西北山海經其山陽多鐵其陰
多赤金山頂有池旁有石室相傳為卞和宅上有抱玉
巖又鳳陽府懷遠縣西南亦有此山山東有卞和洞又

名抱璞岩唐胡曾詩抱玉巖前桂葉稠碧溪寒水至今
流空山落日猿聲急疑是荆人哭未休

安貞石牀

衢州府龍游縣東有龍丘山漢龍丘萇隱居於此與巖
子陵友善終年百歲山際有二疊巖穴外如窓牖中有
石牀唐徐安貞讀書處此山亦名九峯巖

許掾便登

世說許掾好遊山水體便登陟時云許非徒有勝情實

有濟勝之具

宗元久厭

柳子厚嘗作囚山賦晁無咎曰仁者樂山自古達人有以朝市為樊籠者矣未聞以山林為樊籠也蓋宗元謫南海久厭山林不可得而出朝市不可得而復故賦囚山

靈運造幽

宋謝靈運好登山陟嶺必造幽峻常著大屐上山則去

前齒下山則去後齒

子厚履險

宋章子厚與蘇子瞻遊南山抵僊遊潭之上絕壁萬仞岸甚狹子厚推子瞻下潭書壁子瞻不敢子厚乃履險而下以漆墨濡筆大書石壁上曰蘇軾章惇來此子瞻撫子厚背曰子厚必能殺人子厚曰何也子瞻曰能自拚命者必能殺人子厚大笑

謝安別墅

金陵東南有土山一名東山晉謝安舊隱會稽之東山
後居金陵乃築土山擬之山上營立樓館雜植竹樹每
携妓及中外子姪遊集苻堅入寇與姪玄園棋賭別墅
至夜乃還即此宋朱存詩云鎮物高情濟世才欲隨猿
鶴老山隈山花處處紅妝面彷彿如初擁妓來

藏用捷徑

唐睿宗召天台山道士司馬承禎問以陰陽術數對曰
道者損之又損以至於無為安肯勞心以學術數乎上

曰理身無為則高矣如理國何對曰國猶身也順物自然而心無所私則天下理矣上嘆曰廣成之言無以過也承禎固請還山上許之尚書左丞盧藏用指終南山謂承禎曰此中大有佳處何必天台承禎曰以愚觀之此乃仕宦之捷徑耳藏用始隱終南晚徇權利則天時又就徵為諫議故承禎諷之藏用字子潛

匡俗結廬

豫章舊志匡俗字君孝父平野王與鄱陽令吳芮佐漢

定天下而亡漢封俗於鄱陽曰越廬君兄弟七人皆好
道術寓精於洞庭之山故世謂之廬山一說匡俗結廬
於此故名山在南康府西北山下有深洞幽邃旁達約
數十里號朱明真曜洞天上有大小石樓相去五里皆
孤高峻秀邈出雲表重簷四柱宛如樓閣山之東南有
香爐山孤峯突起游氣籠其上則氤氲若烟西南有石
門山其狀似雙闕壁立千仞而瀑布流焉天將雨則廬
山上有白雲冠峰巖謂之山帶不出三日必雨神僊董

奉曾種杏於此唐白居易嘗於香爐峰下立草堂有詩
云倚石攀蘿歇病身青邛杖竹白紗巾他時畫出廬山
障便是香爐峰上人黃魯直詩南康南麓江州北五百
僧房綴密脾盡是廬山佳絕處不知何處合題詩

周顥立舍

齊周顥於金陵鍾山之西巖立隱舍遇休沐則歸又河
南嵩縣有陸渾山唐元德秀愛其佳山水乃定居焉

樂巴求酒

酒香山在岳州府城西南山上有美酒飲者即為僊漢武帝遣樂巴來求果得酒未進東方朔竊飲之帝怒欲殺之對曰酒有驗苟殺臣臣亦不死臣死酒亦無驗遂赦之土俗相傳每春時往往聞山中有酒香尋之莫見其處

羊公作漿

搜神記羊公雅伯洛陽人性篤孝父母終葬無終山遂居焉山八十里上無水公汲水作義漿於阪頭行者皆

飲之三年有一人就飲以石子一斗與之使至高平善
地有石處種之當生美玉并得好婦公如言種之數歲
玉子果生有北平著姓徐氏者女甚有名公試求之徐
氏戲云以白璧一雙來當聽為婚公至種石中得白璧
五雙以為贄徐氏大驚遂以女妻公天子異之拜為大
夫名種石地為玉田

機雲比玉

崑山在蘇州府崑山縣西北境上晉時陸機陸雲生於

此時人比之崑山出玉因名崑山

管鮑分金


鮑山在濟南府城東世傳鮑叔牙管仲分金於此山下有鮑叔城蓋叔牙食邑也

馬遷望湖

姑蘇山在蘇州府城西一名姑胥姑蘇臺在其上漢司馬遷嘗云登姑蘇臺以望五湖即此

余輿鑿路

南昌府寧縣南有毛竹山按圖經此山路塞至宋治平間有余奭者出貲募人鑿至爛泥坪始通往來



山堂肆考卷十六

欽定四庫全書

子部
山堂肆考卷十七

詳校官中書臣源 溶

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣王頌修

欽定四庫全書

山堂肆考卷十七

明 彭大翼 撰

地理

山

石公

石公山在蘇州府西南山根有石如老翁立水中洄不
露潦不沒唐陸龜蒙有詩

麻姑

麻姑山在江西建昌府城西南周圍四百里即三十六洞天之一世傳麻姑於此得道劉禹錫詩雲蓋青山龍卧處日臨丹洞鶴歸時

藥主

藥主山在南昌府奉新縣南唐文蕭綵鸞僊去留藥一粒與其主人因以名山

桐君

桐君山在嚴州府桐廬縣東有異人於此採藥求道結

廬於桐木之下人問其姓名則指桐以示之因號山為桐君山

崆峒問道

廣成子軒轅時人隱居崆峒山石室中黃帝造焉問以至道之要答曰至道之精窈窈冥冥至道之極昏昏默默無視無聽抱神以靜形將自正必靜必清毋勞爾形毋搖爾精毋俾爾思毋慮營營乃可長生山在平涼府城西上有問道宮山之東巖北別峰之陰有廣成子洞

具茨受圖

陽城記黃帝登具茨之山升於洪隄之上受神芝圖於黃蓋童子山在開封府新鄭縣西南

僊人勸合

昔有二山相連後一山名敖山自南而北一山名不返自北而南誓不相合後有一僊人和合勸之二山復相連今人以比媒人

巨靈擘開

郭緣生述征記華山與首陽山本同一山河神巨靈擘開以通河流故掌跡至今存焉

士人望拜

長沙府善化縣西南有嶽麓山即衡山七十二峯之一也上有嶽麓書院宋張栻嘗往來其間下有石方而且平士人於此望拜南嶽因名拜嶽石

畫工寫歸

綱目金主亮嘗密隱畫工於奉使中俾寫臨安吳山以

歸為屏風而圖已之像策馬於吳山絕頂題詩其上有
策馬吳山第一峰之句

秭歸

秭歸縣即古夔國今歸州是也有秭歸山袁松嘗曰屈
原此縣人既被流放忽然暫歸其秭亦歸因名其地曰
秭歸秭即姊也

仙奕

仙奕山在柳州城南上有穴穴有屏有室有宇登者得

石枰於上黑肌赤脉十有八道可以奕因名

天姥

天姥山在紹興府新昌縣名十六福地即季先生修道處

天童

天童山在寧波府城東上有天童寺宋王安石遊山詩
溪水清漣石老蒼行穿溪樹踏春陽溪深樹密無人處
惟有幽花渡水香象山縣有聖娘山相傳昔有一女子

在此山隱見若神

客星

客星山在紹興府餘姚縣東北舊名陳山嚴子陵居此
又湖廣施州衛城西亦有此山

佛日

佛日山在杭州府城東北中有佛日淨慧寺

吏隱

吏隱山在處州府縉雲縣治東北唐李陽冰為縉雲令

秩滿退居於此有臺曰忘歸石壁有吏隱山三大字

神居

神居山在高邳州西南亦名土山上有排牙石人欲數之者其數必差終無能知其數之的者俗傳謝安嘗煉丹於此石井石臼猶存

仙堂

仙堂山在山西潞州襄垣縣山勢巍峩上有龍洞及僊堂寺太平府有仙都山淮安睢寧縣有僊掌山

鬼谷

廣信府貴溪縣南有鬼谷山山峯峭拔兩石對峙如龍
昂虎踞之狀道書為第十五洞天上有蘇秦臺張儀井
世傳鬼谷子居此故名鬼谷子姓王名詡一作詡

聖阜

聖阜山在山西太原府忻州定襄縣西北其山孤峙石
上有二足跡元好問有詩馬水橫陳聖阜前滹沱陂堰
遠相連

靈巖

靈巖山在吳縣西上有石馬望如人騎吳王館娃宮西施洞響簾廊香水溪玩花池在焉又有靈池山在廣東韶州府翁源縣山有老人隱見於此池因名翁水

王屋

王屋山在山西澤州陽城縣南上有僊公洞天廣三十里狀如屋故名列子所謂愚公謀徙者即此

女牀

女牀山在華陰產鸞鳥又河南宜陽有女儿山相傳白
蘭香神女上昇遺几在焉

婦翁舍

大安山在湖廣德安府城西唐許紹家於此李白忤高
力士放還至此許氏以孫女妻之宋黃晦叔詩大安婦
翁舍時來枕流眠

外舅居

判丈山在雲南大理府城南山高千餘仞昔大理段思

平外舅巽判居其上因名

九疑

九疑山在湖廣永州府寧遠縣南晉郭璞云其山九谿
皆相似或云九峰參差互相隱映行者望而疑之故名
唐明皇時有道士申太芝遇異人告以九疑山舊有大
樂一部歲久化為五野豬郡人部之又化為五古器太
芝往求果得之叩之音律相和按九峯一朱明二石城
三石樓四娥皇五舜源六女英七簫韶八桂林九梓林

又徐州城北亦有九疑山俗名九里山有穴潛通瑯琊
王室

四明

四明山在寧波府城西南周圍八百里二百八十峯道
書謂丹山赤水洞天上有四牕穴通日月星辰之光故
號四明孔晳會稽山記四明山高峰輳雲連岫蔽日

五臺

五臺山在太原府五臺縣上有五臺高出雲表頂皆積

土因謂之臺歲積堅冰夏仍飛雪世傳文殊師利所居
清涼山即此一在嘉興府治西北中有石刻法華等經
九室

九室山在襄陽府房縣西相傳五代時陳搏修煉之所
武昌府通山縣東南有九宮山

萬安

萬安山在休寧縣東隋大業末江華築郡城自黟徙治
於此一在河南府東南唐武三思議毀三陽宮以其材

作興泰宮於萬安山卽此

三危

三危山在陝西行都司沙州城東南其山三峰峭絕舜竄三苗於三危禹貢導黑水至於三危卽此

二飛

二飛山在福建興化府仙遊縣北其山蜿蜒百里峙立為二如鳥展翼之狀

七盤

七盤山在陝西西安府藍田縣南近北又有絳坡山杜氏通典七盤十二絳藍田之險路也唐貞元初刺史李西華自藍田至內鄉開新道七百餘里迴山取塗行旅便之平涼府開城縣西有六盤山

六爻

廣西梧州府藤縣城西有六爻山峭絕臨江高三十餘丈山形六級如卦爻然

八卦

鄒縣西南有鳧山其陽有伏羲廟遺址世傳伏羲畫卦
於此故土人呼其處為八卦山毛詩保有鳧繹元楊奐
東游記過泗水地頗高敞南望鳧繹諸峯出沒於烟蕪
雲樹之表即此

三秀

三秀山在福建同安縣西北又名仙人亭山上有石榻
禪牀及仙人蹟

四奇

四奇山在雲南姚安府大姚縣南四峯高聳

八分

八分山在武昌府東南有水分流如八字旁有八分湖
八分院建康錄謂武昌有山無林政可圖始不可居終
山分八字數不及九即此

六合

六合山在六合縣南山有六峯即江浦之定山也梁沈
約有詩標峯彩霞外置嶺白雲間傾壁忽斜豎絕頂

復孤圓

八塔

八塔山在遼東寧遠衛西南上有八小塔

九峻

九峻山在湖廣德安府孝感縣唐大將王鐵鎬所居一
在西安府乾州醴泉縣唐昭陵在馬陪葬諸王七公主
二十一妃嬪八房玄齡等十三人以宰相陪唐儉等五
十三人以承郎三品陪尉遲恭等六十四人以功臣大

將軍陪

九曲

九曲山在雲南大理府洱河東峰岳攢簇狀若蓮花九盤而上又名九重巖上有石洞人莫能通

三平

三平山在福建南靖縣南清寧里唐僧義中嘗從大顛游後建三平院住持此山山有十一奇句容縣有四平山

四基

四基山在山東鄒縣東北上有孟子墓

八部

八部山在貴州黎平府普安州城東諸峰皆石矗然摩
空

九華

九華山錄山在池州青陽縣南峰巒異狀其數有九故
舊名九子山李白陋其名以九峰如蓮花改名九華南

唐以宋齊丘為青陽公遣歸九華即此

萬竹

萬竹山在台州府仙居縣西南九峰迴環叢薄敷秀宋
薛昂避寇於此有詩萬竹山中數十家重重流水繞桑
麻飽餐鼓腹成何事桃李春風任自花

四頂

四頂山在合肥縣城東南俯瞰巢湖上有四峰特起相
傳魏伯陽煉丹之所唐羅隱詩勝景天然別精藍在畫

圖一山分四頂三面瞰平湖

九頭

九頭山在盱眙縣南山有九丘故名

三耳

三耳山在大理府趙州治西三峯高聳如耳又山西遼州東北有五指山半山石壁有五手指文故云

雙牙

雙牙山在成都府簡縣東山頂有古井山半有石箱昔

有兩金鸞浴於井夜棲於箱人欲捕之遂飛上南山化為雙石對峙若牙齒然又雙角山在廣西博白縣城西高二百餘丈二峰角立山下有綠珠井

五山奕人

安吉州南有五山山有五峰昔鄉人姚紵採薪見二人奕觀之稍久二人曰汝可還家今日為汝祥矣紵還家因入甕中隱身謂家人曰可七日勿開未至七日家人誤開紵化為白鶴飛上五山

萬山遊女

萬山在襄陽府西相傳鄭交甫所見遊女處此山之下
曲隈是也又襄沔記以紫蓋山萬山峴山謂之三峴

七星

桂林志七星山在城東舊名七星巖七峰列如北斗旁
有小峯如輔星緣磴而上山半有亭曰簪帶絕頂有道
院又叙州府治東亦有此山七峰並秀狀若連珠故名

九日

福建泉州府南安縣有九日山唐秦系隱此注老子又
半雲山在廣西靈川縣西南又武岡縣有四雲山杭州
有五雲山

崑崙五色

博物志崑崙山縱橫萬一千里神物所集出五色雲氣
五色流水東南流黃水入中國為河十洲記崑崙號崑
陵在西海之戌地北海之亥地去岸十三萬里又有弱
水周迴繞之山形如偃盆下狹上廣故曰崑崙又釋氏

家謂之須彌山為帝釋天所居山頂四峰挺出各高七
百仞山東天下名東弗寺西天下名瞿耶尼南天下名
閻浮提北天下名北鬱單閻浮提今中國四夷皆是也
湟盤經所謂閻浮界內有震旦即此按梵語稱天子為
震旦

蓬萊九氣

十洲記蓬萊山對東海之東北岸周迴五千里外別有
圓海統之圓海水正黑謂之冥海無風而洪波百丈不

可往來上有九氣丈人九天真官蓋太上真人所居唯
飛仙乃能到其處耳

千巖競秀

晉顧愷之遊會稽人問山川之美答曰千巖競秀萬壑
爭流

數峰回抱

丁公言遊東山詩數峯回抱隔烟林一簇招提十里深
祇合步行尋石徑不宜呵喝入松陰遙分畫手揮毫意

暗起詩人得句心
梅嶺笙歌上高處
孤猿幽鳥減清音

掩抱六重

醫巫閭山在遼東廣寧衛西舜封十有二山以此山為
幽州之鎮自是遂為北鎮其山掩抱六重又名六山上
有桃花洞聖水盆

突起三石

四川眉州中巖山半三石突起其形類笋傍有諾詎那
尊者古道場宋元徽初有異僧入牛頭寺主僧厚禮之

別去贈以一鑰曰後欲見我當至中巖山見石笋扣之
可以見我明年寺以低頭佛失珠主僧馳至石笋峰下
扣以鑰峰裂為三乃見異僧曰盜取佛珠在江濱我得
之久矣主僧喜持珠而還宋馮時詩云古寺無人僧作
佛碧潭有水化為龍當年諾詎小游戲一石擊碎成三
峯

三峯並列

金陵城西南有三山下臨大江三峰並列故名晉王濬

伐吳至三山即此謝朓鮑照有晚登三山望京邑詩福
建建陽縣西北有九峰山其山九峰相連屬

三水合流

木葉山在遼東都司廣寧中屯衛東上建契丹始祖廟
奇首可汗在南廟可敦在北廟繪塑二像并八子像相
傳有神人乘白馬自馬孟山浮土河而東有天女駕青
牛自平地松林橫河而下至木葉山二水合流相遇為
配生八子其後族屬漸盛分八部每行軍及時祭必用

青牛白馬云

十日方回

鬱林州北有寒山越王佗遣人入山採橘十日方回問
其故云山中大寒不得歸因名寒山宋余靖詩空翠紛
紛冷不流風雲長是護靈湫山神鞭起龍行雨散作炎
州六月秋

七夕乃越

鳳翔府有隴山其阪九迴欲上者七日乃得越人顧瞻

之莫不悲思俗歌曰隴頭流水鳴聲幽咽遙望秦州肝腸斷絕又名鳴咽水

山無三斑

包山在湖州府烏程縣即古夫椒地吳王夫差所棲也山無三斑謂無蛇虎雉也侯景之亂乃有蛇虎

山有三角

十洲記崑崙山有三角一角正北名閼風巔一角正西名元圃臺一角正東為崑崙王母居焉

都嶠八疊

都嶠山在廣西容縣城南高三百五十餘丈上有八峰
曰馬鞍曰香爐曰仙人曰丹灶曰八疊曰兜于曰雲蓋
曰中峰惟八疊一峰奇秀最高有南北二洞蘇軾送邵
道士還都嶠詩乞得紛紛擾擾身結茅都嶠與仙鄰

思陵三清

思陵山在廣西潯州府城西又名西陵上有三清巖

砥柱三門

砥柱山在河南府陝州城東黃河中禹貢導河東至于
砥柱即此鄴道元注水經禹治洪水凡山陵當水者鑿
之通河河水分流包山在水中若柱然故曰砥柱山有
三門南曰鬼門中曰神門北曰人門

呂梁二城

呂梁山在徐州城東南下有二洪洪上有雲夢梁王二
城土人謂雲夢即韓信梁王即彭越

八公

八公山在壽州東北淝水之北淮水之南漢淮南王安
與其賓客八公登此山學仙今山有安故臺及石上人
馬存焉安養士數千人中有高才八人曰蘇非李上左
吳陳由伍被雷被毛被晉昌為八公按此山一在廬州
府巢縣七脩藁有辨

五祖

五祖山在黃州府黃梅縣東北一名茂山即五祖大滿
禪師道場山頂有池生白蓮花唐裴度詩徧尋真跡躡

每苦世事全拋不忍回上界不知何去處西天移向此
間來又四祖山在黃梅縣西四十里一名破額山即四
祖大醫禪師道場

八將

廣西博白縣城東一里有八將山八峰攢立鳳翔府岐
山縣北三十里有五將山西秦攻長安秦王堅出奔五
將山即此

千夫

千夫山在大同府蔚州廣靈縣西北相傳前代遣千人取花斑石祭禱而後取

梓潼五女

揚雄蜀本記梓潼縣有五女山秦王獻五美女於蜀王蜀王遣五丁迎五女見大蛇入山穴中五丁引蛇山崩五女上山化為石

林慮兩重

昔人有二子師事仙人盧子基於林慮山棲霞谷服飛龍

藥一九十年不饑故魏武帝詩西山一何高望之殊不極上有兩仙童不飲亦不食山在彰德府林縣西北南負太行北接衡岳林慮即隆慮漢避殤帝諱改名林慮

永平雙子

雙子山在永平府西北上有孤竹長君之墓團子山有孤竹次君之墓馬鞭山有少君之墓傳曰國人立其中子蓋次君也

句曲三君

三茅山在句容縣東南初名勾曲象山形也漢茅氏兄弟三人各居一峰得道號三茅君因以名山為三茅峰山下有華陽洞喜泉亭金陵志茅山與蜀岷峨相首尾蔣山實其脉之盡者許邁云茅山是洞庭山西門潛通五岳陶弘景謂東通王屋西連峨眉南接羅浮北連岱嶽三茅君茅濛玄孫長曰盈遇王君得道漢初元中入勾曲山為太元真君弟固武威太守表上郡太守聞兄盈得仙道皆棄官訪從學道俱成地仙固為定錄真君

衷為保命仙君

室中一人

踈屬山在陝西延安府綏德州山海經曰貳員之臣曰危與貳員殺寔寔帝乃梮之於踈屬之山桎其右足反縛兩手以髮繫之於山上盤石之下在開題西北漢宣帝時使人鑿上郡發盤石室中得一人徒裸被髮反縛械一足羣臣莫有識者劉子政按此言之宣帝大驚時人爭學山海經

洞上八仙

白石山在潯州府城南兩峰並立下有巖洞即道書第二十一洞天通北流勾漏洞世傳葛洪嘗往來其間洞之上有會仙巖丹竈及八仙石存焉

千佛嶺

江寧縣東北有攝山輿地志山多藥草可以攝生故名上有棲霞寺齊徵君明僧紹捨宅所建寺有白石浮屠極精巧按江總碑明僧紹居士子仲璋為臨沂令於西

峰石壁與法度禪師鑄造石佛名千佛嶺齊文惠太子
豫章竟陵諸王增飾之嶺之上下巖數百隨其淺深廣
狹為佛之大小惟正一巖高可五丈內坐釋伽佛傍立
菩薩二皆四丈八尺下為天開巖白乳泉唐劉長卿有
登東峰尋明徵君故居詩

五老峰

五老峰在廬山五峰如五老相連故名唐李白詩曰廬
山東南五老峰青天削去金芙蓉九江秀色可攬結吾

將此地巢雲松

吳王種香

香山在蘇州城西吳王種香處下有採香徑

越王種葛

采葛山在紹興府東勾踐種葛於此使越女治布獻吳王採葛人歌曰嘗膽不苦味若飴令我採葛以作絲

陸賈植花

肇慶府西有錦石山宋洪邁夷堅志曰漢陸賈使南越

尉陀與之泛舟於錦石山下賈默禱曰我若說王稱臣
當以錦裹石為山靈報使還募人植花卉於山以代錦
後人因立廟祀之宋乾道中梁竑入都艤舟石下夜夢
一客自彌陸大夫云我抑鬱於此千餘歲矣君幸見臨
願留一詩竑題詩於壁而去

曼卿擲核

石棚山在海州朐山東北棚嶺甚峻了無花木石曼卿
判海州讀書於此乃以泥裹桃核擲其上數年間花發

滿山

夷齊採薇

史記武王平殷亂天下宗周而伯夷叔齊耻之不食周粟隱於首陽山採薇而食之遂餓死山在平陽府蒲州東南即禹貢雷首山是也

劉阮採藥

天台山在浙江台州府天台縣西即衆聖所降葛仙翁山也漢明帝時劉晨阮肇入天台山採藥失道食盡見

桃實食之覺身輕行數里至溪澣持盃取水見一杯流出中有胡麻飯溪邊二女子笑曰劉阮二郎捉向所失流杯未便迎歸作食食之二人既出無復相識至家子孫已十世矣此山上應台星故曰天台高一萬八千丈周迴八百里

秦精採茗

武昌山在湖廣武昌府武昌縣南晉武時宣城人秦精入此山採茗遇一毛人長丈餘引精至山曲示以聚茗

既別復還探囊中橘遺精精怖負茗而歸

元周積粟

倉樂山在襄陽府竹山縣東北昔有邑人徐元周積粟於此救飢鄉人德之故名

蒜山

山在鎮江府西大江岸上山多澤蒜因名

茶山

山在蘄水縣北山出茶劉禹錫詩薤葉照人呈夏簞松

花滿碗試新茶又廣信府北亦有此山以陸羽嘗居此故名

穀城

山在山東兗州府東阿縣漢張良遊下邳圯上遇一老人授一篇書曰後十三年孺子見我濟北穀城山下黃石即我矣孔文祥曰黃石公鬚眉皆白杖丹蓆履赤舄葛稚川云即老子也老子無世不出教易姓名出於黃帝時號廣成子文王時號丈人先生武王時號郭叔子

漢初號黃石公漢文時號河上公

忝谷

山在順天府懷柔縣東跨密雲界劉向云燕有谷地寒
不生黍稷鄒衍吹律以溫其氣故名山曰忝谷

梅嶺

梅嶺即大庾嶺在南安府大庾縣城西南磅礴高聳南
接南雄初嶺路峻阻唐宰相張九齡開鑿新路兩壁峭
立中塗坦夷上多紅梅故名梅嶺嶺表有關曰梅關宋

橫浦居士張九成所築按大庾縣本漢南楚縣地漢初南粵不貢武帝遣將軍庾勝討之因築城於此因名大庾縣嶺亦以縣名之又補陀落迦山一名梅岑在寧波定海東北舊昌國縣海中佛書所謂海岸孤絕處也

桃源

山在衡州府桃源縣南秦時有千餘人入洞避難因隱於此

瓜埠

瓜埠山在六合縣南滁水經此入江峭絕若砥柱舊傳
魏主臨江處

花巖

山在江寧縣去牛頭山五里唐貞觀中僧法融棲巖下
遇大雪忽有奇花二莖生巖側又有白鳥獻花之異

竹里

山在句容縣北途甚傾險號曰翻車峴宋武帝破桓玄
於竹里即此

梨洲

山在奉化縣晉孫興公弟承公遊此獲仙梨食之成仙故名

桃葉

山在六合縣西志云隋伐陳詣冶山祇洹寺問解脫禪師何以克陳師云桃葉必克乃造桃葉舟渡江憇此山傍故名

木皮

木皮嶺在鞏昌府徽州西杜詩云首露栗亭西尚想鳳凰村季冬攜童稚辛苦赴蜀門南登木皮嶺艱阻不易論始知五嶺外別有他山尊後王巢之亂王鐸置關於此以遮秦隴

賀蘭

賀蘭山在陝西寧夏城西一名賀人丹崖翠峰巍然峻大盤據數百里寧夏倚以為固趙元昊居興州依賀蘭山為固即此一在彰德府磁州城西北相傳昔宋賀蘭

真人居此

瑞筠

臨江府治南有瑞筠山本唐歐陽處士宅有瑞竹色如銀故名

桐栢

桐栢山在河南南陽府唐縣東南河圖曰桐栢山為地穴上為維星

苧蘿

苧蘿山在紹興府諸暨縣南下有方石乃西施晒紗處
又紫桑山在九江府城西南寰宇記云紫桑近栗里陶
潛乃此中人

峨眉

峨眉山在蜀眉州城南自岷山延袤三百里至此突起
三峰其二峰對峙宛若眉然上有石龕百二十大小洞
四十

峴首

金史卷之八十七
十道志羊祜嘗與從事鄒湛共登峴山垂泣曰自有宇
宙便有此山由來賢達勝士登此遠望如我與卿多矣
皆湮滅無聞念此使人傷悲我百年後魂魄猶當登此
山也湛對曰公德冠四海道符前哲令問令望當與此
山相傳若湛輩當如公語耳

陪尾

陪尾山在湖廣德安府城東北即禹貢所謂熊耳外方
桐栢至於陪尾是也一名橫尾

卑耳

史記齊桓公曰寡人北伐山戎過孤竹西伐大夏涉流
沙東馬懸車上卑耳之山卑耳在河東大陽

覆手

覆手山在德安府應山縣東一峰五澗望之狀如覆手
故名

折腰

折腰山在山西平陽府垣曲縣西北山有銅冶

壺頭

壺頭山在湖廣辰州府東以山頭與東海方壺山相似故名漢光武建武中馬援征武陵蠻進營壺頭會暑甚士卒疫死援乃穿山為室以避炎氣今山邊有石窟即援所居室也室中有蛇如百斛舡或謂乃援之餘靈

釜頂

釜頂山在丹徒縣與京峴山相連京峴在縣東即秦所鑿泄王氣處吳謂之京口鎮以此

秀容

秀容山在山西遼州榆社縣治東南山下有秀容川

露骨

露骨山在鞏昌府階州治北宋神宗時王韶進破訶諾木藏城穿露骨山即此

武夷遺骸

武夷山在福建建寧府崇安縣南周圍百餘里道書謂十六洞天相傳嘗有神降於此自稱武夷君又列仙傳

錢鏐二子長曰武次曰夷因以為名宋朱子武夷圖序
武夷之名著自漢世祀以乾魚不知果何神也今崇安
有山名武夷相傳即神所宅峰巒巖壑秀拔奇偉兩崖
絕壁人不到處徃徃有枯查插石罅間似度舟船棺柩
之屬柩中有遺骸外列陶器尚皆未壞疑前世道阻未
通川壅未決時蠻夷所居而漢所祀者即其君長蓋亦
避世之士為衆所臣服而傳以為仙也今山之羣峰最
高且正者猶以大王為號半頂有小丘焉豈即君之居

耶又按大王峰一名天柱峰其西又有幔亭峰四垂斗絕秦始皇二年八月十五日武夷君置酒餞會鄉人於此建幔亭綵屋設寶帳施紅雲紫霞褥呼鄉人為曾孫宋白玉蟾詩人間幾度曾孫老惟有青山自古今

羅浮合體

羅浮乃羅山浮山合體浮山本蓬萊之一峰昔時洪水泛漲浮海而來附於羅山崖巘相合故合名羅浮在增城博羅二縣之境嶺十五峰三十二其峰之秀者曰飛

雲玉鶯會仙會真錦綉玳瑁洞之幽者曰金沙石臼朱陵朱明黃龍黃猿蝴蝶又有跳魚石伏虎石阿耨池恒樂池乃花首臺龍公竹皆山之奇勝唐顏真卿早年典郡江南遇道士陶八八授與一刀圭碧霞丹令服之約他日相待於羅浮山後真卿為盧杞所陷令單車問罪於李希烈至汜水忽逢陶笑謂曰吉吉遂指嵩少而去真卿去汴州希烈僭號使人害公於近郊及希烈敗詔公得歸葬偃師北山後有商人至羅浮忽見兩道人樹

下圍棋一道士笑謂商人曰奉寄一書達吾家立札一封題寄偃師北山顏家商人至詢所居則瑩庄也守塚老蒼頭得書大驚曰此先太師親翰也因以藏於室子孫擇日發塚即已空矣徑往羅浮尋之竟無跡

形如釜盎

水經會稽秦望山在州南為衆峰之傑吳越春秋稱山形如覆釜盎盎中有金簡玉字書黃帝之遺識也

形如覆舟

應天府城北有覆舟山東際青溪北臨玄武湖

狀如端冕

桂林志侯山在城西高聳如公侯端冕之狀故名上有金鈎巖巖在山絕頂攀援曲折而上俯視諸峰如培塿然

狀如方印

應天府東南有方山狀如方印一名天印山秦鑿金陵山䟽秦淮水比其所斷處

媧宮簫鼓

南康記君山翠麗鮮明宛若臺榭名曰媧宮風雨之後
景色明淨頗聞簫鼓之聲

仇池樓櫓

秦州記仇池山形如覆囊上廣百頃壁立千仞有自然
樓櫓今在平涼府成縣西北戰國為白馬氐羗國晉時
楊難當二世據此杜甫詩萬古仇池穴潜通小有天神
魚人不見福地語真傳

石穴留書

荊州記小酉山石穴中有書千卷相傳昔人避秦於此
學道因留之梁湘東王繹賦訪酉陽之逸典謂此今山
在湖廣辰州府西北五十里大酉山在府西北四十里
山巔有善卷墓

山阿埋劍

廣西蒼梧志火山在城南臨大江延袤五十里蓋吳郡
之案山也每夜火光有野燒狀或言水中有珠故光燭

於上或言南越王陀埋劍山阿故然寰宇記云山下有丙穴嘉魚生焉

玉笋瑶簪

宋范至能桂山志池之九華歛之黃山括之仙都溫之鴈蕩夔之巫峽此天下同珍之者然皆數峰而止又必因重岡複嶺盤亘而來非若桂之千峰旁無延緣崛然特立玉笋瑶簪森列無際甚怪且多誠為天下第一韓退之詩水作青羅帶山如碧玉簪黃魯直詩桂嶺環成

如鴈蕩平坡蒼玉忽嵯峨觀二子語意則桂山之奇固
在目中又山皆中空故峰下多佳巖洞且去城不遠一
日可以徧遊

日精月華

鳳陽府皇城北有萬歲山中都城統其上山之東西二
峰對峙東曰日精西曰月華宋徽宗政和中遣戶部孟
揆於上清寶籙宮之東築山以像餘杭之鳳皇山號萬
歲山

山如長蛇

燕山在順天府玉田縣西北自西山一帶迤邐東來延袤數百里抵海岸宋蘇轍詩燕山如長蛇千里限夷漢首銜西山麓尾挂東海岸

山如伏龍

真定府元氏縣西北有封龍山山勢如伏龍欲飛舉狀舊名飛龍山唐改今名李公緒為記

斗峻箕張

齊山在池州府貴池縣唐杜牧九日登齊山有詩即此
以山有羣峰勢皆齊等故名或云唐刺史齊映嘗好此
山因名其山形則腸蟠腹捆斗峻箕張其氣候則雨焉而
骨脇立日焉而華采呈暑避流漿寒入絛續空巖靈竇
響石飛泉不可勝紀

雲從星拱

西山在順天府西舊記太行山首始河內北至幽州第
八陁在燕強形巨勢爭奇擁翠雲從星拱於京師之右

每大雪初霽千峰萬壑積素凝華若圖畫然為京師八景之一

鶴驚虎嘯

仰山在鳳陽府西金章宗嘗遊幸有詩刻石云金色界中恍率景碧蓮花裏梵王宮鶴驚清露三更月虎嘯疎林萬壑風

樵語牧唱

晉郗詵數月山行聞樵語牧唱曰洗盡吾塵土腸胃乃

倚驂臨水久之而去

太行石髓

太行山在山西澤州府城南自此東西一帶諸山雖因地立名其實皆太行之支脉也六帖曰昔王烈嘗入太行山聞雷聲往視之見山石上破數百丈石中有一孔尺餘中有青泥流出烈取搏之隨手堅凝氣味如粳米飯仙經所謂石髓也服之壽與天齊

少室玉膏

河圖少室山有白玉膏服之成仙山在河南登封縣北
嵩山之一峰也山有三尖峯東曰太室西曰少室

會稽射的

水經注會稽有射的山遠望如射侯土人以暗占米價
諺云射的白斛一百射的玄斛一千

烏程車蓋

山謙之吳興地記烏程縣車蓋山之東舊有晉太守殷
康所立亭矚望極佳

新豐湧出

慶山在西安府臨潼縣東南唐武后時因風雷湧出此山初高六尺餘漸高至二百餘丈武后改新豐為慶山縣江陵人俞文俊上言天氣不和而寒暑併人氣不和而疣贅生地氣不和而埤阜出今陛下以女主處陽位反易剛柔故地氣隔塞而山變為災陛下謂之慶山臣以為非慶也

天竺飛來


靈鷲山在天竺國晉咸和中西天僧慧理登杭州飛來峰歎曰此是天竺國靈鷲山之小嶺不知何年飛來因名其峰曰飛來

石立

漢昭帝元鳳三年泰山石立上林僵柳復生

土起

漢哀帝建平二年無鹽危山土起瓠山石立



山堂肆考卷十七